



Inatsisartuni ilaasortaq Olga P. Berthelsen, Inuit Ataqatigiit
/ Maani

§ 37 naapertorlugu apeqqummut nr. 2012-083-mut, attartortunik anisitsisarnermut tunngasumut akissuteqaat

27. marts 2012

Sagsnr. 2012-063640

Dok. Nr. 866351

Asasara Olga

Aallarniutigalugu apeqqutitit, nalinginnaasumik ineqarneq aammalu pingaartumik attartortut pisussaaffii pisinnaatitaaffiilu, aammalu angerlarsimaffeqanngitsunut tunngatillugu isumaginnikkut ajornartorsiutaasinnaasut pillugit oqallinnermi ingerlasumi soqutiginaateqarlunnartut pillugit qutsavigerusuppakkit.

Postboks 909

3900 Nuuk

Tlf. (+299) 34 50 00

Fax (+299) 34 54 10

E-mail:

iaan@nanoq.gl

Attartortut piffissaq eqqorlugu ineqarnermut akiligassaminnik akiliisarnissartik pisussaaffigaat. Ineqarnermut akiliutit inissianik ingerlatsinermut atorpeqartarput. Ineqarnermut akiliutinit isertitat missingersuusiarineqartut malillugit aningaasartuutitut matussutigineqartarput.

Attartortut ineqarnermut akiligassaminnik akiliinissaminnut akissallit aamma attartortut ineqarnermut akiligassaminnik akiliinissaminnut akissaqanngitsut, aammalu isumaginninnermut inatsisit naapertorlugit ineqarnermut tapiiffigineqarnissamut pisortanilluunniit ikiorserneqarnissamut pisinnaatitaaffeqartut immikkoortinnissaat pingaaruteqarpoq. Tassalu attartortut ineqarnermut akiligassaminnik akiliinissamut akissaqartut ineqarnermut akiliiniaratik aalajangertarnerat immikkut ajornartorsiorfiusarpoq, tamannalu anisitsinermik suliat ilaanni pissutaasarpoq.

Apeqqut 1: Nuup avataani inigisaminnit anisitaasimasut, qanoq sumullu aammalu qanoq atugassaqartinneqarlutik inisseqqinneqarallartarpat?

Akissut: Attartortunik anisitsisarnerit Inatsisartut peqqussutaat nr. 2, 12. maj 2005-imeersoq naapertorlugu pisarput. Akiliisitsiniartartoq (Politiit) Kalaallit Nunaanni Eqqartuussisaaseq pillugu Inatsimmi tamanna pillugu maleruagassat naapertorlugit anisitsinernik isumaginnittarpoq.

Apeqqut. 2: Assersuutigalugu Qeqqata Kommuniani, 68-t anisitaasimasut inissinneqarallartarpat, imaluunniit angerlarsimaffeqanngitsutut inuuneqalerpat? Qaasuitsup Kommuniani 18-t, Kommuni Kujallermi 33-t Sermersuullu Kommuniani 7-t.

Akissut: Inuit aalajangersimasut pillugit suliani paasissutissat A/S Inissiatileqatigiiffik INI-mit kommuninillu najugarineqartunit pigineqarput.

Apeqquut. 3: Sooruna assersuutigalugu Qeqqata Kommuniani, anisitaasimasut 68-isut illusitseqqiffissamik atorfissaqartitsinngitsut? Nuummi 7-t (2011) atorfissaqartitsisut?

Akissut: Najukkami angerlarsimaffeqanngitsunut unnuisarfimmik pilersitsisoqassanersoq, imaluunniit inisseeqqinnissaq allatut pissanersoq kommunip naliliiffigisussaavaa, kiisalu A/S Inissiaatileqatigiiffik INI-mit naliliiffigineqartussaalluni.

Apeqquut. 4: Angerlarsimaffeqanngitsut pillugit misissuinerit, qanoq ingerlappat aammalu sumut killippat?

Akissut: Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfik ilisimatitsivoq, 2012-ip ingerlanerani nuna tamakkerlugu misissuinerimik ingerlatsinissaq pillugu Naalackersuisoqarfimmit SBI isumaqatigiissuteqarfigineqarsimasooq. Misissuinerimi kalaallit angerlarsimaffeqanngitsut inissisimanagerisa paasiniarneqarnissaa pingaaruteqarluinnartutut suliarineqassaaq. Tamanna tunngavigalugu sapinngisamik nuna tamakkerlugu ajornartorsiutip annertussusia misissorneqassaaq. Tamanna tunngavigalugu aaqqiissutissat maannakkut atuuttut, taamatullu aaqqiissutissat allat nalilersorneqassapput. Misissuinerup immikkoortui assigiinngitsut tamarmik sullissisut assigiinngitsut, ajornartorsiummut attuumassuteqartut, qanittumik suleqatigalugit ingerlanneqassapput, taakkunungalugu Namminersorlutik Oqartussani, taamatullu inissiaatileqatigiiffinni, kommunini NGO-nilu sullissisut assigiinngitsut ilaatinneqassapput. Aamma Ilisimatusarfik misissuineq pillugu suleqatigiinnermut ilaatinneqassaaq. Tamatumani siullermik ilisimasat assigiinngitsut ilaatinneqarnissaasa qulakkeerneqarnissaa siunertarineqarpoq, taassumalu aamma tulliatut atugarliortut pillugit ilisimasat, Ilisimatusarfimmit pigineqartut, annertusarneqarnissaat aamma/imaluunniit assigiinngisitaartinneqarnissaat siunertarineqarluni. Misissuineq nalunaarusiamik, kingusinnerpaamik 2012-imi decembarip naanerani piareersimasussamik inerneqassaaq.

Apeqquut. 5: 2010 aammalu 2011-mi sinerissami, inigisaminnit anisinneqartut katillugit 283-sut, taakkunanit qassit inuit ataasiakkaajuppat? Aammalu qassit inoqutigikkuutaajuppat?

Akissut: Ineqarnermut Naalackersuisoqarfik tamanna pillugu paasissutissanik pigisaqanngilaq, suliaasaq taanna A/S Inissiaatileqatigiiffik INI-mit isumagineqarmat.

Apeqquut. 6: Innuttaasut akiliisinnaassuseqaraluartut inuttulli ajornartorsiuteqarnertik peqqutigalugu, inigisaminnit anisitaasartut ikiorserniarneqartarnerat, qanoq isumaginninnikkut malinnaaffigineqartigaa?

Akissut: Inunnut anisitaasimasunut isumaginninnermi inuussutissanik ikiorserneqartartunut, tassalu pisortanit ikiorserneqartartunut, siusinaarlutik sulisinnaajunnaarnersiuteqartunut utoqqalinersiuteqartunulluunniit tunngatillugu, inatsisit malillugit isumaginnittoqarfinni pineqartuni isumaginninnermi suliat pineqartut malinnaaffigineqassapput. Inunnut anisitaasimasunut isumaginninnermi inuussutissanik ikiorserneqartanngitsunut tunngatillugu immikkut naliliineq tunngavigalugu tassangaannaq pisariaqartilikkanut imaluunniit ataasiaannartumik aningaasartuutissanut pisortat ikiorsiisinnaapput.

Naggasiut:

Anisitsinerit angerlarsimaffeqannginnerlu ineqarnermit ajornartorsiutaavoq taamatullu isumaginninnermi ajornartorsiutaalluni, tassanilu kommunit isumaginnittoqarfii isumaginninnermut inatsimmi sinaakktissat iluanni ikiorsiisinnaapput tapersiisinnaallutillu.

A/S Inissiaatileqatigiiffik INI Namminersorlutik Oqartussat inissiaataanik aqutsisuuvoq, aammalu inatsisit malittussaallugit, tamatumalu kingunerisaanik attartortup ineqarnermut akiligassani akilersimangippagit, INI-p attartornermut isumaqatigiissut atorunnaarsittussaavaa. Tamanna pissutigalugu attartortut akiliisimatinnagit A/S Inissiaatileqatigiiffik INI akiliinissamut nukingisaarutinik attartortunut nassiussisarpoq, attartortullu ineqarnermut akiligassatik akilinngippatigit naggataagut anisittussaallugit.

Neriuppunga Kalaallit Nunaanni angerlarsimaffeqanngitsut pillugit misissuineq ingerlasoq, ineqarnermut politikki aamma isumaginninnermut politikki eqqarsaatigalugit anisitsisarnerit angerlarsimaffeqanngitsullu qanoq iliuuseqarfiginissaannut nutaamik isummernissatsinnut tunngaviliiumaartoq.

Inussiarnersumik inuulluaqqusillunga

Jens B. Frederiksen